



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Gemeinsam Äntwert vun der Madamm Ministesch fir Gesondheet a sozial Sécherheet a vum Här Minister fir auswäerteg Ugeleeënheeten an Aussenhandel op d'parlamentaresch Fro n° 2964 vum 30. September 2025 vum honorabelen Deputéierten Här Marc Goergen.

1. Kann d'Ministesch eng Oplëschtung maache mat der Unzuel u Spezialisten, déi hei am Land Medezin exerzieren?

2. Wéi huet sech d'Unzuel u Medezinner hei am Land (Generalisten a Spezialisten zesummen) tëschent 2014 an haut an absoluten Zuelen a prozentual entwéckelt?

3. Wéi huet sech d'Bevëlkerungszuel tëschent 2014 an 2024 entwéckelt?

An de leschten 10 Joer ass d'Unzuel vun den Dokteren, déi zu Lëtzebuerg praktizéieren¹, em 54,0% geklommen. Déi stäerksten Evolutioun fënnt ee bei den Zännokteren, wou d'Unzuel vun den Dokteren am Joer 2024 em 71,5% méi héich ass ewéi 2014. D'Unzuel vun de Spezialisten ass em 52,8% geklommen an déi vun de Generalisten em 41,6%.

Op 1 000 Awunner gekuckt, ass d'Unzuel vun den Zännokteren an de leschten 10 Joer vun 0,84 am Joer 2014 op 1,18 am Joer 2024 eropgaang, déi vun de Spezialiste vun 2,31 op 2,92 an déi vun de Generaliste vun 0,97 op 1,13.

Joer	2014	2019	2024	Evolutioun 2014/2024
Unzuel un Dokteren	2320	2900	3572	54,0%
Unzuel u Generalisten	546	664	773	41,6%
Unzuel u Generaliste pro 1 000 Awunner	0,97	1,06	1,13	16,9%
Unzuel u Spezialisten	1303	1588	1991	52,8%
Unzuel u Spezialiste pro 1 000 Awunner	2,31	2,54	2,92	26,1%
Unzuel un Zännokteren	471	648	808	71,5%
Unzuel un Zännoktere pro 1 000 Awunner	0,84	1,03	1,18	41,6%
Unzuel un Awunner zu Lëtzebuerg	563 000	626 108	681 973	21,1%

Quell: STATEC, Datebank vun der sozialer Sécherheet, Berechnung IGSS.


Eng Persoun gëtt als praktizéierenden Dokter gezielt wann se fir dee Beruff eng Autorisatioun fir ze praktizéieren vum Ministère fir Gesondheet a sozial Sécherheet ausgestallt krut an och effektiv bei engem Employeur aus dem Gesondheetssektor oder bei engem Employeur aus engem anere Sektor zu Lëtzebuerg de Beruff als Dokter ausüübt.

Wann een d'Unzuel vun de Generaliste pro 1 000 Awunner vu Lëtzebuerg mat där vun eisen Nopeschlänner vergläicht, stellt ee fest, datt Frankräich an d'Belsch méi Generaliste pro 1 000 Awunner hunn ewéi Lëtzebuerg.

¹ Den Term « praktizéieren » am Kontext vun dësem Äntwert op d'parlamentaresch Fro Nr. 2964 entsprécht der Methodologie, déi am leschten thematesche Bericht vum Gesondheitsobservatoire presentéiert gouf, mam Titel « [Les professionnels de la santé au Luxembourg: un modèle d'évaluation quantitative](#) ».




Graphique 1: Evolutioun vun der Unzuel u Generaliste pro 1 000 Awunner am internationale Verglach



Quell: OECD Datebank, STATEC, Datebank vun der sozialer Sécherheet, Berechnung IGSS.

Däitschland huet iwwert d'Period vun 2014 bis 2023 déi héchsten Unzuel u Spezialiste pro 1 000 Awunner, Lëtzebuerg läit op der zweeter Plaz.

Graphique 2: Evolutioun vun der Unzuel u Spezialiste pro 1 000 Awunner am internationale Verglach




Quell: OECD Datebank, STATEC, Datebank vun der sozialer Sécherheet, Berechnung IGSS.

Bei den Zänn Dokter läit Lëtzebuerg, am Verglach mat sengen Nopeschlänner, un der Spëtzt wat d'Unzuel pro 1 000 Awunner ugeet.



Graphique 3: Evolutioun vun der Unzuel un Zänndoktere pro 1 000 Awunner am internationale Verglach



Quell: OECD Datebank, STATEC, Datebank vun der sozialer Sécherheet, Berechnung IGSS.

4. Huet d'Regierung d'Zuelen aus de Froen 1 bis 3 fir d'Groussregioun?

Dës Donnéeën sinn aktuell net vollstänneg verfügbar.

Déi eenzeg verfügbar Donnéeën sinn déi, déi vum Observatoire national de la santé analyséiert goufen. Den Observatoire huet e Rapport iwwer d'Gesondheetsberuffer (dozou zielen och d'Medezinner) publizéiert, souwéi Informatiounsblieder mat Statistiken, déi reegelméisseg aktualiséiert ginn. Dës Blieder ginn en Iwwerbléck iwwer verschidde Gesondheetsberuffer zu Lëtzebuerg, dorënner Hausdokteren a Pédiatere. D'Informatiounsblieder kënnen op der Websäit vum Observatoire consultéiert ginn, an der Kategorie *Rapports*².

5. A wéi enge medezinesche Beräicher feelen aktuell Spezialisten hei am Land souwéi an der Groussregioun?

En attraktive Statut fir jonk Dokterer déi an der Spezialisatioun sinn, ass eng Viraussetzung fir sou vill wéi méiglech Medezinner op Lëtzebuerg ze zéie fir hei am Land e Stage ze maachen. Oft kommen déi Stagiären dann och nom Ofschloss vun hirer Spezialisatioun op Lëtzebuerg zeréck, fir hei z'exerzéieren. Iwwer dat lescht Joer ass, an Zesummenaarbecht mat de betreffen Akteuren, aktiv zesumme geschafft gi fir de jonke Medezinner déi zu Lëtzebuerg e Stage maachen am Kader vun hirer Spezialisatioun, besser Conditionen ze schaffe fir sou méi attraktiv ze gi géigeniwwer vun der Offer am Ausland. Doriwwer eraus, ginn d'Stagë vu méi wéi 4 Woche vun de Medezinsstudente säit 2 Joer bezuelt, wat erlaabt och d'Studenten déi an der medezinescher Grondausbildung ageschriwwe sinn, op Lëtzebuerg ze zéien an se iwwer dee Wee och fir den Exercice vun hirem zukünftege Beruff hei am Land ze motivéieren.

² <https://obs.gouvernement.lu/fr/rapports/les-professionnels-de-la-sante.html>



6. Wéi wäert dës Penurie geléist ginn, wéi vill Doktere sollen heihinner ugezu ginn a bis wéini wäert dës de Fall sinn?

De Ministère huet eng grouss Campagne lancéiert fir d'Promotioun an d'Valoriséierung vun de Gesondheetsberuffer, inklusiv déi medezinesch Beruffer.

D'Ziel vun der Campagne ass et, dës Beruffer ze promovéieren an op déi wuessend Erausfuerderunge vum Gesondheetssektor ze reagéieren:

- D'Gesondheetsberuffer valoriséieren, andeems hir Diversitéit a Komplexitéit ervirgehewe ginn.
- Jonk Leit inspiréieren, fir eng Karriär am Gesondheetsberäich unzegoen, am Kontext vum Alterungsprozess vun der Bevëlkerung an dem wuessende Besoin u Fleeg.
- Motivéiert, passionéiert an engagéiert Profiller unzéien, fir de Gesondheetssystem ze stäerken.
- D'Éffentlechkeet informéieren a sensibiliséieren duerch Video-Zeegnësser, Beruffsbeschreibungen, Interviewen a Bloggen.
- D'Präsenz vun der Campagne um Terrain an op de soziale Medien (Facebook, Instagram, LinkedIn, YouTube) stäerken, souwéi bei Eventer wéi Studentemessen an Orientéierungsforumen.
- D'Zesummenaarbecht tëscht de Ministère fir Gesondheet, Famill, Educatioun a Fuerschung fërderen.

7. Wéi steet d'Regierung zu der Iddi, fir ee Spezialfong anzeriichten (zesummen an der Groussregioun), fir kuerzfristeg kënnen Dokteren, déi am Ausland praktizéieren, an d'Groussregioun unzezéien, bis dass een d'Penurie u Spezialisten an de Grëff kritt?

Wéi an den Äntwerten op d'Froen 5 a 6 beschriwwen ginn ass, ass am leschte Joer vill dru geschafft gi fir de jonke Medezinner hei am Land d'Conditounen ze verbesseren an et leeft aktuell eng grouss Campagne fir d'Gesondheetsberuffer an déi medezinesch Beruffer ze valoriséieren. Elo muss gekuckt gi wéi déi verschidde Mesuren sech auswierken.

Lëtzebuerg, den 30. Oktober 2025

D'Ministesch fir Gesondheet
a sozial Sécherheet

(s.) Martine Deprez